

et dimidium. Semper in navi, nisi cum, uti dixi, excendimus ad Pembrochium. Tres menses fuimus: cum nobis in die non darentur nisi circiter unciæ duæ panis et non multum salsi piscis et aqua fere semper fœtida; ideoque miramur quomodo in morbum non inciderimus. Quod pauci Anglorum evadere potuerunt, imo ejusdem etiam aliquot mortui sunt. Sed nimirum Deus nos custodivit placatus Vestræ Paternitatis ac totius Societatis precibus; faxit ipse pro sua bonitate ut id cedat ad majorem ipsius gloriam emendationemque morum meorum ac salutem. Hoc spero per preces ac [21] benedictionem Vestræ Paternitatis quam humillime et quanto affectu possum nixus genibus flagito. Dmūs [Dominus] Jesus Vestram Paternitatem custodiat semper et Sanctissimis suis gratiis augeat, Pater optime et suavissime.

Vestræ Paternitatis
filius obediens ac servus indignus
PETRUS BIARD

Ambiani, 26 Maii, 1614.